

金史紀事本末

〔清〕李有棠撰

金史紀事本末

第二卷
第一四至卷三六
册

中華書局

金史紀事本末卷十四

高麗賓服

太祖收國元年（乙未一一一五）秋九月，帝克黃龍府，命瓜爾佳薩哈攻保州。

遼史地理志云，號

宣義軍，統州軍二、縣一。宣州定遠軍、懷化軍均開泰三年置。來遠縣，徙遼西諸縣及奚漢戶置。高麗降，於此置榷場。

保州近高麗，遼侵高麗置保州。至是，命薩哈取之。高麗國王王楷。其地鴨渚江。

新唐書云，馬訾

水，出靺鞨長白山，色若鴨頭綠，號鴨渚水，經元菟郡至遼東安平縣入海，行一千一百里。

以東，海蘭路舊置總管府，

改爲尹。東南至高麗界五百里。

〔攷異〕元史，海蘭府有海蘭河，流入於海。元一統志，海蘭河在瀋陽路，經舊建州東南

一千里入於海。明一統志，海蘭河在建州東，東南流千餘里入海。元海蘭府以此名。又有伊勒呼水。今寧古塔城至圖

們江朝鮮界六百里皆有海蘭河，則自海蘭窩集至大、小海蘭河皆金時海蘭路一帶舊境歟。以南，東南皆至於海。

自遼時歲時遣使修貢事，具遼史。唐初，靺鞨有粟末、黑水兩部，皆臣屬於高麗。唐滅高

麗，粟末保東牟山，在瀋陽中衛東二十里。漸強大，號渤海，姓大氏。至唐末爲遼滅。金伐遼，渤

海來歸，蓋其遺裔也。黑水靺鞨居古肅慎氏地。有長白山，金國所由起，雖舊屬高麗，久不

相通。及金滅遼，高麗以事遼舊禮，稱臣於金。初，高麗有醫者居女直之完顏部。穆宗時，戚屬有疾，醫之愈，使桑阿原作叟阿送歸高麗。醫者歸，語人曰：「女直居黑水部者，部族日強，兵益精悍，年穀屢稔。」王聞之，乃通使女直。既而和索哩來歸，遂率伊勒呼嶺東諸部皆內附。〔攷異〕高麗與金通好，在穆宗十年癸未，維時在遼爲天祚帝乾統二年，在宋爲徽宗崇寧二年。是年，高麗使來，十月，康宗嗣位，交聘表俱畧而不書。見元會汾金史攷證。今按，崇寧二年，乃乾統三年，恐誤。厥後，海蘭甸諸部，盡欲納款，高麗使人邀止之。會穆宗卒，康宗嗣，遣碩碩歡〔攷異〕楊復吉遼史拾遺補作石適歡。率兵趨和尼原作活涅水，徇地海蘭甸，〔攷異〕遼史拾遺補作曷懶甸。收叛亡七城。高麗使來請議事，使者往，拒不納。五水之民附高麗，執團練使十四人。〔康宗〕（據金史卷一世紀補）二年，高麗再來伐，碩碩歡再敗之。高麗復請和，前所執團練使皆遣還。〔攷異〕高麗傳，勝昆烏林答部人，康宗時使高麗見殺，卽世宗昭德皇后曾祖勝管也。見世紀。又世祖時兀虎部人烏春黨滓不乃弟，卷六十五謝庫德傳世祖時加古部孛堇，三人同名勝昆。碩碩歡立幕府於三漈水（據金史卷一三五高麗傳補），撫定邊民，康宗以爲能。〔攷異〕薛應旂通鑑云，三年三月，高麗侵女真，女真敗之。高麗既與女真通好，會烏雅束遣石適歡以兵徇曷懶甸之地，下其七城，高麗恐不利於己，使人請議事。石適歡使盃魯往，而曷懶甸亦使二詳穩如高麗，高麗執二詳穩，而拒盃魯不納，於是五水之民皆附高麗，執團練使十四人，進攻女真，石適歡連破之，追入關登水，逐其殘衆踰境，高麗乃遣使議和。所載較詳。按，關登水，高麗傳作布騰水，又異。四年丙戌，高麗使黑歡方石來賀襲位，遣博囉原作盃魯

報之。高麗約還諸亡在彼者，乃使阿古、原作阿晤雙寬往受之。高麗背約，殺二使，築九城於海蘭甸，以兵數萬來攻，烏色原作幹賽。本傳，世祖子，軍還，卒，後追封衛國王。子宗永誅宗磐有功，世宗時歷震武節度使。敗之。幹魯原作鄂囉亦築九城，與高麗九城相對。高麗復來攻，烏色復敗之，進圍其城。高麗約還遁逃，退九城之軍，復所侵故地，遂與之。〔攷異〕額圖琿傳，時從烏色爲前鋒，高麗兵屯海島，率衆三十人夜渡，焚其營寨戰艦，大破之，遂下托津城。既而八城皆下，功最。阿里傳，歡塔攻高麗九城，遇敵於穆爾茂水，力戰，子阿里馳刺其將，敵遂潰。歡塔與碩頡歡合兵於圖門水，阿里首敗敵兵，取二城。及入寇，復禦卻之。阿里追及於海蘭水，殺畧幾盡。復合碩頡歡兵，敗敵兵五萬，又遇敵七萬，阿里先登，大破之。赫木頗傳，錫默部人，性忠直，勇於戰。初，內附和勒端，合軍攻降諸部，因領其衆。及弟和摩爾噶、歡塔、姪阿里攻下諸城，破高麗戍兵，與碩頡歡討平諸部。及破海蘭甸，下托囉城，均有功。卒，贈銀青光祿大夫。續通考云，太祖未即位時，使幹賽伐高麗，爲具于毬場以待捷音，有二摩渡水至，獲之，太祖曰：「此休徵也。」言未既而捷書至。高麗傳均未載。太祖卽位，使薩哈攻保州，久不下，請濟師，屢破敵，多所俘獲，詔獎之。冬十一月，係遼籍女直瑪穆丹原作麻憐大灣等十五人皆降。攻開州，遼史地理志云，本濊貊地，號鎮國軍，高麗爲廣州，在咸興府西北。取之，盡降保州諸部女直。以薩哈爲保州路都統。時，太祖已破走遼主軍。薩哈破和卓、順化二城，復請濟師攻保州，使幹魯以甲士千人往。

二年（丙申一一一六）春正月，〔攷異〕高麗傳作閏月。高麗遣使來賀捷，且求保州，詔許自取之。仍命薩哈等謹守邊戍。及進攻保州，遼守將遁去，而高麗兵已在城中。其王使富尼瑪

再請保州，詔諭當別議。

天輔元年（丁酉一一一七）春正月，開州叛，瓜爾佳薩哈等討平之。

秋八月癸亥，高麗遣使來請保州。〔攷異〕高麗傳均未載，今從太祖紀。

二年（戊戌一一一八）冬十二月，詔諭高麗國王曰：「朕始興師伐遼，已嘗布告，賴皇天助順，屢敗敵兵，北至上京，南至於海，其間京府州縣部族人民悉皆撫定。今遣貝勒卓巴克〔攷異〕太祖紀作珠卜，云原作尤字。報諭，仍賜馬一匹，至可領也。」

三年（己亥一一一九）冬十一月，海蘭甸長城，高麗增築三尺，邊吏發兵止之，弗從，報曰：「修補舊城。」貝勒呼嚕古、原作胡刺古錫馨原作習顯以聞。詔曰：「無得侵軼生事，但慎固營壘，廣布耳目而已。」

四年（庚子一二二〇），咸州路都統司以兵分屯於保州、博囉威原作畢里圖（三）〔一二〕據金史卷一三五高麗傳改城，請益兵，詔曰：「汝等分列屯戍，以固封守，甚善。高麗累世事遼，或有交通，可常遣人偵伺。」使錫馨以獲遼國州郡諭高麗。其國方誅亂者，使謂錫馨曰：「此與先父國王之書。」錫馨就館。凡誅戮官僚七十餘人，即以舊禮接見，而以表來賀，並貢方物。

太宗天會元年（癸卯一二二三），以遼主亡入夏國報之，高隨、舍音奉使高麗，至境上，接待之禮不遜，隨等不敢往。太宗曰：「高麗世臣於遼，當以事遼之禮事我。而我國有新喪，遼

主未獲，勿遽強之。」命隨等還。

二年（甲辰一二二四）夏（六）〔五〕〔據金史卷三太宗紀改〕月乙巳，海蘭路軍帥完顏呼魯古原作忽刺估等言：「往者歲捕海狗、海東青、鴉、鶻於高麗之境，近以二舟往，彼乃以戰艦十四要而擊之，盡殺二舟之人，奪其兵仗。」帝曰：「以小故起戰爭，甚非所宜。今後非奉命，毋輒往。」

秋七月壬辰，和碩台原作鶻實答言：「高麗納吾叛亡，增其邊備，必有異圖。」詔曰：「納我叛亡而弗歸，其曲在彼。凡有通問，毋違常式。或來侵略，整爾行列，與之從事。敢先犯者，雖捷必罰。」

冬十月丙寅，命南路軍帥棟摩原作闍母以甲士千人益哈斯罕路地理志云，初置節度使，治寧州，本高麗蓋葛牟城，後建爲辰州遼海軍，改蓋州奉國軍，縣四。〔攷異〕續通考云，初爲蓋州路，金罷曷蘇館，建辰州遼海軍，領湯池、建安、秀岩、龍岳四縣，神鄉、大寧二鎮。貝勒完顏愛實拉戌海島，以備高麗。

四年（丙午一二二六）夏六月丙申朔，高麗王楷奉表稱藩，優詔答之。

秋七月丙寅，遣高伯淑等宣諭高麗。〔攷異〕高麗傳，副使係烏至忠，諭凡遣使往來，當盡循遼舊，仍取保州路及邊地人口在彼者，須盡數發還。仍敕伯淑曰：「若一一聽從，卽賜以保州地。」伯淑至，王楷附表謝，一依事遼舊制。畢沉續通鑑云，金遣知制誥韓昉使高麗責誓表，高麗謂要盟長亂，聖人所弗與。昉以古者巡守朝覲之事折之，乃如約。太宗紀未載。靖康要錄云，元年冬，高麗王楷遣使賀登寶位，差衛膚敏爲館伴。至明州，差官押送禮物赴闕。明年四月，使人歸國。

冬十月丁未，高麗賀天清節。

十一月庚申，以高麗充高麗生日使。

五年（丁未一二二七）秋八月戊寅，遣耶律居謹等充宣慶使，以宋捷諭高麗。

冬十月辛未，天清節，高麗遣使來賀。自是信使不絕。〔攷異〕交聘表，爲居謹副者尚有張淮。太

宗紀未載。

八年（庚戌一二三〇）春正月甲辰朔，高麗遣使來賀。

是歲，楷上表乞免索保州亡人邊戶。既而，勗復表請之，太宗從之。封域始定。〔攷異〕

交聘表繫之九年二月，稍異。

十年（壬子一二三二）春正月癸巳朔，高麗遣使來賀。〔攷異〕薛應旂通鑑云，是年四月，高麗王楷遣崔

惟信、沈起入貢於宋，獻金、銀、參、帛，詔賜惟信、起金幣及酒食於同文館，時紹興二年也。據此，則高麗復有通宋之事。玉海云，紹興四年閏四月，高麗遣使貢金幣。高麗傳俱未載。

十三年（乙卯一一三五）熙宗廬卽位，不改元。春正月，遣使如高麗告哀，且報卽位。

三月己卯，高麗使祭奠弔慰。

夏四月戊午，高麗使賀登寶位。

冬十二月癸亥，始定使臣朝賀、賜宴、朝辭儀。

十四年（丙辰一一三六）春正月癸酉，頒歷於高麗。

冬十月甲寅，遣乾文閣待制吳激賜高麗生日。〔攷異〕元好問中州集載吳學士激有送韓鳳閣使高麗

詩句云：「海東絕域皇華使，天上仙官碧落鄉。」〔卿〕據中州集甲集改。〕激字彥高，宋宰臣拭子，米芾壻也。工詩能文，字畫得其婦翁筆意。將命帥府，被留爲待制，出知深州，旋卒。有東山集十卷并樂府行世。

皇統二年（壬戌一一四二）春正月乙未朔，高麗遣使來賀。乙巳，命伐高麗。辛亥，萬壽節，高麗遣使來賀。詔加楷開府儀同三司、上柱國。

冬十二月乙丑，高麗遣使謝封冊。

六年（丙寅一一四六）夏五月壬申，高麗王楷卒。

六月乙丑，遣使弔祭高麗并起復嗣王睨。明年遣使來謝。〔攷異〕畢沅續通鑑云，九月，高麗請入貢，宋不許。給事中汪藻草詔，畧曰：「壞晉館以納車，庶無後悔；閉玉關而謝質，匪用前規。」帝善之，以爲得體。時建炎三年，乃天會七年也。熊克小紀云，係高麗王楷事。詔畧曰：「比年多故，強敵稱兵，如信使之果來，恐有司之不戒，俟休邊境，當問聘期。」直學士汪藻筆。所載各異。據此，則高麗有通宋之事，金蓋未之知耳。

八年（戊辰一一四八）春二月壬子，遣克埒克巴噶原作哥魯葛波古橫賜高麗。甲寅，以大理卿宗安等爲高麗封冊使。

夏六月乙卯，高麗使謝賜封冊。〔攷異〕高麗傳均未載，交聘表亦未書宗安等封冊事，今從熙宗紀。

海陵天德元年（己巳一一四九）冬十二月，高麗賀正旦使至廣寧，遣人諭以廢立事，中路遣

還。

〔攷異〕高麗傳於海陵朝凡使報往來均未載，今從交聘表及海陵紀備載之。

二年（庚午一一五〇）春正月辛巳，以名諱告諭高麗。

三月丙戌，高麗遣知樞密院事文公裕、殿中（丞）〔監〕（據金史卷六〇交聘表改）朴純、沖賀、登寶

位。

〔攷異〕海陵紀繫之六月丙午，未列公裕等名，今從交聘表。

三年（辛未一一五一）秋九月庚戌，遣判官蕭子敏賜高麗生日。

四年（壬申一一五二）秋九月丙午，遣都水使者完顏滿丕（原作麻潑）賜高麗生日。

貞元元年（癸酉一一五三）春正月辛卯朔，以弟完喪，不視朝，命有司受高麗貢獻。

秋九月丁亥朔，遣郎中幹克珊（原作窠合山）賜高麗生日。

正隆二年（丁丑一一五七）夏四月，遣簽書宣徽院事張喆、橫賜、高麗。

三年（戊寅一一五八）秋九月丁丑，遣高存福、賜高麗生日。

四年（己卯一一五九）秋九月，遣宣武將軍完顏德濟、賜高麗生日。

六年（辛巳一一六一）秋八月，遣太常博士張崇、賜高麗生日。

世宗大定元年（辛巳一一六一）冬十一月壬午，命完顏烏肯、徹（原作兀古出）報諭高麗。〔攷異〕高

麗傳未載，今從交聘表及世宗紀。

二年（壬午一一六二）冬十二月，高麗衛尉少卿丁應起賀正旦。〔攷異〕世宗紀、高麗傳均未載，今從

〔交聘表〕。

三年（癸未一一六三）春二月庚寅，高麗守司空金永（允）〔胤〕（據金史卷六一交聘表改，下同）、禮部侍郎金湊夫進奉使，禮賓少卿許勢修賀登寶位，秘書少監金居實謝宣諭。

三月壬辰朔，李公老賀萬春節。

夏四月己卯，韓綱橫賜高麗。

冬十月丙寅，伊喇塔富拉原作移刺天佛留賜高麗生日。

十二月乙酉，金存夫謝橫賜。〔攷異〕世宗紀只於二月庚寅書高麗使賀萬春節，未列金永（允）〔胤〕等五人名，而金存夫之謝橫賜亦未載，今從交聘表。

四年（甲申一一六四）春正月丁亥朔，高麗遣高處約賀正旦。

三月丙戌朔，崔孝溫、鄭孝偁賀萬春節。

秋九月辛亥，遣烏庫哩薩哈原作三合賜高麗生日。

冬十二月，高麗使金莊謝賜生日。〔攷異〕世宗紀於高麗使人均未列名，今從交聘表，下倣此。高麗傳云，時鴨綠江堡戍頗被侵越焚毀。紀、表均未載。

五年（乙酉一一六五）春正月辛亥朔，高麗使高珍縉賀正旦。帝因朝辭，諭曰：「邊境小小不虞，爾主使然耶？疆吏爲之耶？果疆吏爲之，爾主亦當懲戒之也。」初，高麗使者別有私

進禮物，以爲常。是歲，萬春節使者陳力升、元頤沖私進，帝以不應典禮，詔罷之。

冬十月辛巳，遣太宗正丞璋賜高麗生日。

十二月，高麗使李知深、尹敦信賀尊號，王輔謝賜生日。

六年（丙戌一二六六）春正月丙午朔，高麗使李世儀賀正旦。

三月甲辰朔，趙仁貴、李復基賀萬春節。

夏四月戊戌，遣伊喇道橫賜高麗。

冬十月己卯，遣伊喇諳達原作（伊）「移」刺按答（據金史卷六一交聘表改）賜高麗生日。

十二月戊戌，高麗使崔椿謝賜生日，金資用謝橫賜。

七年（丁亥一二六七）春正月庚子朔，高麗使潘咸有賀正旦。

三月己亥朔，柳德容賀萬春節。

冬十二月壬戌，崔儼謝賜生日。〔攷異〕世宗紀，是年九月遣都水監李衛國賜高麗生日，〔交聘表〕未載。

八年（戊子一二六八）春正月甲子朔，高麗使金起賀正旦。

三月癸亥朔，金光利、趙湜賀萬春節。

冬十月乙未，遣宗室靖賜高麗生日。

九年（己丑一二六九）春正月戊午朔，高麗使陳元光、徐諏賀正旦。

三月丁巳朔，金利誠賀萬春節，崔偕進奉。

夏五月，遣圖克坦懷貞橫賜高麗。

秋九月丙辰，遣馬貴中賜生日。

冬十二月庚戌，高麗使裴衍謝賜生日，李世美謝橫賜。〔攷異〕世宗紀於高麗遣使謝賜生日及橫

賜，均未載。

十年（庚寅一二七〇）春正月壬子朔，高麗使陳升賀正旦。

三月壬子朔，崔（仇）〔仇〕〔據金史卷六一交聘表改〕崔光陟賀萬春節。

冬十月己酉，遣宗室堅原作亂。〔攷異〕高麗傳作太宗正丞亂。賜高麗生日。

十一月己卯，高麗翼陽公皓廢親自立，稱兄讓國，求封冊，不受賜親生日使。詔遣使詳

問。〔攷異〕世宗紀未載。

十一年（辛卯一二七一）春正月壬辰，高麗王皓報稱，前王病，不治事，皓權國政。

夏四月丁卯，皓上表，并以兄表求封。〔攷異〕高麗傳繫之三月。

五月，遣宗室靖宣問。皓實篡國，囚覲海島，靖至高麗，竟不得見。乃以詔授皓，轉取

覲表附奏。靖還，帝問大臣，皆曰：「覲表如此，可遂封之。」丞相良弼等曰：「得皓祈請未

晚也。」

冬十二月丁卯，皓遣禮部侍郎張翼明等請封。

〔攷異〕交聘表作張明翼，世宗紀未書，今從高麗傳。

十二年（壬辰一一七二）春三月己巳朔，高麗使金黃裕賀萬春節，蔡祥正賀加上尊號。丁丑，遣烏庫哩思列、張亨爲封冊使。

夏四月丁卯，高麗使李著、崔誦賀尊號。

冬十月，金于蕃、金瑄謝封冊。

十三年（癸巳一一七三）春正月乙丑朔，高麗使史正儒賀正旦。

三月癸巳朔，李應求賀萬春節。

冬十一月甲午，遣大洞賜高麗生日。

十四年（甲午一一七四）春正月己丑朔，高麗使崔均賀正旦。

〔二月〕（據金史卷六一交聘表補）丙戌，車仁揆進奉。

三月戊子朔，金練光賀萬春節。

夏四月乙亥，遣完顏佛甯。原作蒲涅，橫賜高麗。

冬十一月戊申，遣曹士元賜生日。

十五年（乙未一一七五）秋九月辛卯，高麗西京留守趙位寵叛其君，請以慈悲嶺以西、鴨渌江以東四十餘城來獻，不納。未幾，伏誅，來告，詔慰答之。時，位寵謀叛皓，遣徐彥（甯）（據金

〔史卷一三五高麗傳刪，下同〕等九十六人上表曰：「前王本非避讓，大將軍鄭沖、郎將李義方實弑之。臣位寵納土，請兵助援。」帝曰：「王皓已加封冊，位寵輒敢稱兵爲亂，且欲納土，朕懷撫萬方，豈助叛臣爲虐。」詔執彥〔甯〕等送高麗，亂定，遣使謝。〔攷異〕〔交聘表〕奏告平亂使爲朴紹。十一月，遣阿克古富勒呼賜高麗生日。十二月，高麗使趙永仁來謝。世宗紀均未載。王寂拙軒集有送田元長接伴高麗告奏使詩云：「聖朝萬里息烽烟，冀馬吳牛盡穩眠。蝸國弄兵貪裂地，蟻臣將命懇呼天。政須老手不生事，故遣吾髯更著鞭。想到鴨江文字飲，德星清對兩詩仙。」時王皓定亂，遣使告奏。卽此詩所云。

十六年〔丙申一一七六〕春正月戊申朔，高麗使李章賀正旦。

三月丙午朔，蔡順禧賀萬春節。

冬十一月甲子，遣伊喇子元賜高麗生日。

十二月庚子，高麗使王珪謝賜生日，吳光陟、尹崇誨以不許趙位寵內附，陳謝。

十七年〔丁酉一一七七〕春正月壬寅朔，高麗使吳淑夫賀正旦。丙午，有司奏所進玉帶，乃石似玉者，詔勿問。

二月己亥，高麗使丁守弼進奉。

三月辛丑朔，崔光遠賀萬春節。

夏四月戊子，遣圖克坦烏哲原作烏者橫賜高麗。

冬十二月戊辰，遣布薩懷忠賜高麗生日。甲午，高麗使崔美謝橫賜。

十八年（戊戌一二七八）春正月丙申朔，高麗使孫應時賀正旦。

二月癸巳，崔孝求進奉。

三月乙未朔，李仁成賀萬春節。

冬十一月丙戌，遣左光慶賜高麗生日。

十二月戊午，高麗奇世謝賜生日。

十九年（己亥一二七九）春正月庚申朔，高麗使金節賀正旦。

二月丁巳，柳得仁進奉。

三月己未朔，盧卓儒賀萬春節。

冬十一月戊辰，遣盧拱賜高麗生日。

十二月壬子，高麗使柳得義謝賜生日。

二十年（庚子一二八〇）春正月（庚申）〔甲寅〕（據金史卷六一交聘表改）朔，高麗使尹東輔賀正旦。

二月辛亥，金鉉公進奉。

三月癸丑朔，孫碩賀萬春節。

夏四月己亥，遣郭喜國橫賜高麗。

冬十一月乙亥，遣任倜賜高麗生日。

十二月丙午，高麗使沈晉升謝生日，王度謝橫賜。

二十一年（辛丑一一八一）春二月甲辰朔，高麗使李德基進奉。

三月丁未朔，申寶至賀萬春節。

二十二年（壬寅一一八二）冬十一月甲申，遣布薩忠佐賜高麗生日。

二十三年（癸卯一一八三）春正月丁卯朔，高麗使崔永濡賀正旦。

二月甲子，文章煒進奉。

三月丙寅朔，盧孝敦賀萬春節。

夏四月癸丑，遣赫舍哩珠爾蘇原作述列速橫賜高麗。

冬十二月丁亥，高麗使崔孝著朝辭，以詔答王皓。

是歲，皓母任氏卒。

二十四年（甲辰一一八四）春二月甲戌，王皓以母憂未卒哭，請免今年萬春節及進貢，詔允。不陳賀，其進貢方物，令隨明年正旦使全來。〔攷異〕高麗傳云，皓以母喪，乞免賜生日及賀謝等事，詔從之。且繫之二十三年，稍異。丙戌，遣完顏濟勒、郝（倭）〔俛〕（同上）爲勅祭使，大仲尹慰問，永明起復。

冬十月，以上京天寒，詔明年賀使權停一年，其回謝使，後隨朝賀使全來。